

玉芝堂談薈

明徐應秋輯

第十五冊

進步書局校印

玉芝堂談薈卷三十三

姑茂徐應秋君義父輯

龍生九子

戒菴漫筆載李西涯懷麓堂集云龍生九子不成龍各有所好囚牛平生好音樂今胡琴頭上刻獸是其遺像睚眦平生好殺今刀柄上龍吞口是其遺像嘲風平生好險今殿角走獸是其遺像蒲牢平生好鳴今鐘上獸紐是其遺像狻猊平生好訟今獄門上獅子頭是其遺像負屨平生好文今碑兩旁文龍是其遺像螭吻生平好吞今殿脊獸頭是其遺像又陸文量菽園雜記云古器物異名屬龜其形似龜性好負重故用載石碑螭吻其形似獸性好望故立殿角上徒牢其形似龍而小性好吼叫有神力故懸於鐘上憲章其形似獸有威性好囚故立於獄門上饕餮性好水故立橋上蟋蟀形似獸鬼頭性好腥故用於刀柄上螻蛄其形似龍性好文彩故立於碑文上金独其形似獅性好烟火故立於香爐上椒圖形似螺蚌性好閉口故立於門上蚺蛇其形似龍而小性好立險故立於護朽上鰲魚其形似龍好吞火故立於屋脊上

獸物其形似獅子好食陰邪故立門環上金吾形似美人人首魚尾有兩翼其性通靈不昧故用巡警云出山海經博物志然今本皆無之其名凡十三與前說異弘治間泰陵令中官問龍生九子名目於李少師東陽李不能悉詢於吏部劉員外績得其說於故冊面上因據以復胡侍真珠船稱歷考傳記睚眦見戰國策聶政范睢傳蒲牢見班固東都賦注狻猊見穆天子傳及爾雅狴犴見字林翬負見西京賦吳都賦蚩蚩當作鴟尾漢世越巫請以厭火都不見有龍子之說霸下一作蚩蚩

龍見洵陽

易稱飛龍在天又稱乘龍御天龍者帝王之象其見宜為吉祥乃考之記傳晉恭帝元年冬東方黑龍四昇於天齊清河元年齊州濟河水中見八龍昇天唐武曌三年有龍三十見洵陽水中顯慶二年五月庚寅有五龍見於岐州皇后泉前燕慕容皝時有黑白二龍見於龍山王僧虔傳有龍五色入鸚鵡州其時並非治平又考晉書呂光庶子纂篡位咸寧二年有龍出東嶺井中到殿前蟠卧比旦失之俄有黑龍升於當陽九宮門鳩摩羅什曰龍者陰類出入有時而令屢見則為災眚必有下人謀上之變則其為不祥固彰彰矣魏為晉制則蘭陵之龍屢見於井中宋信誣妄則茅山

之龍或騰於幡上龍虀夏庭而殷祚殄龍孔人家而孫皓降黃山有死龍王莽伏誅之徵也野王山有死龍漢獻將廢之兆也齊稱木德伐枯桑而得死黃龍於孔中兆武成之亡也周色尚黑黑龍墜死亳州則周武之殞也至宋紹興八年夏金虜熙州濬水有蒼龍見明日有黃龍以爪擎嬰兒為戲者三又有帝者服乘白馬六蟾蜍在其前尤從來未有之異也

龍背有金彩三道

宋上清宮先天節道場香火龕中獲小龍背有金彩三道尾有翠文寸餘紹興初朱勝非出守江州過梁山龍入其舟纔長數寸赤背綠腹白尾黑爪目有光政和元年夏兩晝夜凡數日及開霽開封府茶肆中有異物如犬蹲踞卧榻下身僅七尺色蒼黑其頭類驢兩頰作魚頰而色正綠頂有角甚長於其際分兩歧聲如牛鳴與世所繪龍無異行都瑛橋旌忠廟有二蛇出沒大者盈尺方鱗金色首脊有金錢遇霽忽變化數十百遊蕉卉間右四則果龍耶物有似之而未必真龍耶

鹽龍

楊用修云吉吊上岸與鹿交或在水邊遺精遇流槎枯枝粘裏號紫稍花道樞所謂

鹽龍有益幃箔者也。小說蕭注從狄殿前之破蠻洞也。收其實貨珍異得一龍長尺許。云是鹽龍蠻人所養。藉以銀盤每鱗中出鹽少許。以玉筋搗得。用酒和飲之。可以助陽。後因蔡元度就其體舐鹽而龍死。與楊說微不同。

守藏龍

酉陽雜俎稱龍在閭浮提者五十七億龍於瞿陀尼不降濁水。西州人食濁則天單越人惡冷風雲不發冷。於弗娑提州不作雷聲。不見電光。東洲人惡之也。杰公謂羅子春制龍石能制微風雨。召戎虜之龍不能制海王珠藏之龍。又云震澤洞中有千歲龍能變化。出入人間。善譯時俗之言。是龍之類。固不一也。玄怪錄開元中葉天師講經於明州奉化縣。忽一老父禮拜。自云守藏龍。守此千歲。方免炎沙之罰。令為胡僧呪水。欲取統天鎮海之寶。天師以符救之。波停風息。老父泣謝。仙師命致清泉。遂成石渠。經冬不竭。至今謂之天師渠。又唐乾符中有僧日以課誦為事。因下峽泊舟白帝。夜深持念。忽覺有腥穢氣。水面一人曰。某姓許。名道坤。唐初為夔牧。以貪殘受業報。為灩澦堆龍王三千年。於今二百四十年矣。適聞師持課。故來迎謝耳。僧曰。峽路險惡。多覆溺之患。盡赦諸龍而禁戢之可乎。曰。此類實繁。皆業報所作。非常力所

能制也。僧將問忽失。同光中。滄州民於路逢白蛇。以繩繫之。擲其頭落。須臾雷電撮此子上空中。為雷火焚燒死。墜地背有朱書曰。此人殺安天龍。為天符所誅。裴劍傳奇。開成初。僧金剛仙。西域人。居清遠峽山寺。善拘鬼神。制蛟螭。於峽山潭傍。掘錫而呪。水開見底。有一泥鰕。長三寸許。躍入瓶中。語寺僧曰。此龍也。吾至海門。以藥煮為膏塗足。則渡海若履平地。是夜龍王化白衣叟。持黃金百兩。以餽寺僧。懇捨其龍。金剛仙傾鰕於潭。泛舶而歸。道書陳希夷初隱武當山。有五老人來聽講易。謂希夷曰。吾輩日月池中龍也。此地非君所棲。令希夷閉目。凌空御風。及張目。已在華山石上。或云希夷之睡。乃五龍所授。蟄法也。曇超居靈苑山。一定累日。忽見一人作禮曰。弟子赤亭山神也。村民驚山壞。龍窟羣龍忿誓。三百日不雨。今已百日。田地枯涸。欲屈救蒼生。超許之。乃至赤亭。為龍祝願。龍亦悔悟。化為人。見禮於超。明日大雨。西湖遊覽志佛國記。波知國有三池。大池有龍王。次者龍婦。小者龍子。行人設祭。乃得過。不祭多遇風雪。伽藍記。西方烏場國。西有池。龍王居之。龍王每作神變。國王輒投金玉珍寶。祈之名曰龍王寺。寺僧衣食待龍而濟。古龜茲王阿主兒有神力。能降毒蛇。龍時有人買市人金銀寶貨。錢至夜悉化為灰。王有男。先出家。成阿羅漢果。王問之曰。此龍

所為居北山王至龍所叱龍驚起化為獅子王乘其上龍曰王勿殺我當與王乘心有所向隨心而至王后遂乘龍而行韓退之詩衙時龍戶集上日馬人來英珣云長安有龍戶見水即知有龍或引出但如鯢魚

紅葉化龍

龍神物也奮則起於天衢蟄可藏於草甲其可豢可醢者特蛟蜃之類耳酉陽雜俎有史秀才者元和中與道流遊華山時暑月環憩一小溪忽有一葉大如掌紅潤可愛隨流而下史接得真懷中須臾覺漸重潛起視之覺葉上鱗起栗栗而動史驚懼棄林中遽白衆曰此必龍也可速去下山未半風雨大至霏雪錄山東民婦一臂有物隱然膚中屈結如蛟龍狀婦喜時時以臂浸盆水中一日雷電交作婦自牖出臂一龍擘雲而去稽神錄王建稱尊於蜀其嬖臣唐道襲夏中大雨所蓄猫戲水簷溜下視之稍稍而長俄而前足及簷雷霆大至化為龍而去高僧傳什僧伽閑而宴息見神告曰天方亢陽百姓苗死身胡藏其嬾龍耶伽曰為之奈何神曰若今夕但小指出窗隙外其如人何伽依之其夜霆擊異常質明視指微有紅線脈焉聞奇錄唐金州僧文淨因夏屋漏滴於腦遂成小瘡經年若一大桃來歲五月後因雷霆震文

淨睡中不覺寤后贅痛人視之如刀割有物隱處乃蟠龍之狀也嘉話錄釋道宣持律第一。忽一旦霹靂繞戶外宣曰吾持律無犯若宿業則不知之視其十指甲有一點如油麻在右小指上乃出於隔子孔中一震而失黑處是蛟龍之所蟠也異苑陶侃嘗捕魚得一織梭還掛於壁有頃雷雨梭變成赤龍從屋騰躍而去傳奇載崑山縣遺尺潭本大曆中村女為皇太子妃遺玉尺化為龍至今遂成潭杜陽編德宗時日林國獻龍角鈿類玉紺色上刻蛟龍之形帝賜獨孤后與帝汎舟龍池有紫雲自叙上而生俄頃滿舟中帝命置室內以水噴之化為二龍騰空去集異記唐元和間都尉韋宥出牧温州忽忽不樂一日晚涼跨馬登岸依舟而行忽淺沙亂流蘆葦青翠因縱轡飲馬而蘆枝有拂鞍者宥熟視見有新絲箏絃周纏蘆心宥即收蘆伸絃其長倍尋試縱之應手復結宥家有妓即付箏妓曰我於蘆心得之試施於器以聽其音妓安於箏更無少異唯短二三寸耳方饌妓即置之□□復結食罷視之則已蜿蜒搖動妓驚告衆競來觀之而雙眸瞭然矣宥駭曰得非龍乎命衣冠焚香致敬盛諸盂水之內投之於江纔及中流風雷昏暗白龍百尺擎攬升天霏雪錄有縫人坐一室忽壁中瑟瑟有聲少間至壁處一小蛇隨出隨大俄風雨化龍而去西

陽雜俎僧無可言近傳有白將軍者嘗於曲江洗馬馬忽跳而驚走前足有物白如衣帶縈繞數匝遽令解之流血數升白異之遂藏紙帖中寘衣箱內一日送客至澹水出示諸客客曰盍以水試之白以鞭築地為竅置虫於中少頃虫蠕蠕而長竅中泉湧有黑氣如香烟竟出簷外眾怪之曰此必龍也急歸未數里風雨驟至大震數聲蜀郛有青將郭彥郎行舟峽江至羅雲澆方食而卧心神恍惚夢一黃衣曰莫錯已於口中探一物而去覺來咽喉腫痛於時篙公輩但見船上雷雨晦冥震聲甚厲則龍入口也古琴錄荀季和有琴曰龍唇一日大風雨失去三年後復大風雨有黑龍飛入李膺堂中膺諦視之曰此荀季和舊物也送還季和恐復飛去嵌金於背以厭之改名曰飛龍宣室志政陽法喜寺唐元和末寺僧頻夢一白龍自渭水來至殿西楹蟠繞且久乃直東而去每夢則明日必雨或言佛寺亦龍所居故釋氏有天龍八部僧召工合土為偶龍而於殿西楹置焉蜿蜒鱗鬣甚得雲間之勢豐慶初見一物從西軒直出乘雲望渭水而去夜將分始歸西軒下細視之白龍也又數日寺僧盡出赴齋及歸視像龍已失矣及晚陰雲起渭水而逼佛宇像龍已在西楹上鬚鬣鱗甲若盡沾濕因以鐵鎖系之金微變化錄孫登琴遇雨必有響如及物聲竟因

陰雨破作數截。有黑蛟湧去。張僧繇嘗於金陵安樂寺畫四龍。不點目睛。謂點之則騰驤而去。人以為誕。固請之。因為落墨。纔及二龍。果雷電破壁。徐視畫已失矣。獾圍吳興有村媪。畜一伏雌於床下。為霹靂所擊。死庭中。媪子持刀后門。燭治之。鸞刀一下。光怪燭天。忽見一青蛇。從鷄腸中蜿蜒入水。霹靂一聲。蒼龍上騰於天矣。玉笥山錄。漢武帝時。玉笥山民感山靈異。謀共置一觀。既構闕中。梁一條。忽一夜震雷風烈。天降白玉梁一條。光彩瑩目。因號玉梁觀。魏武帝時。遣使取之。化為白龍。劈烟霧而去。晉永嘉戴氏子。入郁木山。見兩青石。堵白玉梁於岩下。其上赤書五行皆天文雲篆。又如隱雷之聲。鱗甲張起。飛去。不知其所。雲仙雜記。南唐時。有蒼頭持龍水圖來。貨或得之。將練為衣。忽釜中雲蒸起。見二龍騰躍穿壁而去。蘄州有白龍源山。嘗見白鶴伏卵。化龍而去。

龍蛻

春渚紀聞。橫海清池縣尉張澤。居於鄆州東城。夜自莊舍還。而月色昏暗。過道傍木枝。燐然有光。因折以燭路。至家插壁間。晨起取視。則枝上有一龍蛻。大如新蟬之殼。頭角爪尾俱全。暗則光燭於室。北夢瑣言。江南蘆荻之間。往往燒起龍。唐天復中。澧

州葉源村民鄧氏子燒畚柴草積於天井。火勢既盛。龍突出。騰在半空。風力益甚。狂
焰彌熾。擺之不落。竟仆地而死。長亘數百步。朱梁末。長州民向氏燒起一龍。四面風
雷。急雨不能滅。□□煨燼而角不化。瑩白如玉。向氏竇而藏之。唐年補錄。咸通末。青
龍關死於桐城縣。百姓胡氏庭中。時四月。尚有蠶箔在庭。忽雷聲暴起。雲中有擊觸
聲。血如醺雨。灑蠶箔上。而不汙。箔漸旋結聚。拾置掌中。冷痛入骨。初龍拖尾及地。遶
一泔桶。即騰身入雲。及雨。悉是泔也。龍既死。長十餘丈。身尾相半。尾本扁薄。鱗鬣皆
魚。惟有鬚長二丈。其足有赤膜翳之。雙角長二丈。南史。永明五年。獻龍角一枝。長九
尺三寸。色紅有文。世說。晉陸士衡嘗餉張華以鮓。華發器使曰。此龍肉也。以苦酒濯
之。必有異。試之。有五色光起。士衡乃窮其所繇。鮓主曰。家園中積茅下。得一白魚。質
狀殊常。以作鮓。過美。故以餉陸也。琴莊美事。崔奉國家一種李肉。厚而無核。識者曰。
天罰乘龍。必割其耳。耳血墮地。故生此李。拾遺記。海人乘霞舟。以雕壺盛數升龍膏。
獻昭王。昭王然以為燈。光曜百里。手參基記。取蛻龍牙一枚。手握之。臨局自然機變。
橫出。續松漠記聞。阿保機居西樓口。氊帳中。晨起。見黑龍長十丈。蜿蜒其上。引弓射
之。即騰空天矯而逝。墮於黃龍府之西。相去已千數百里。纔長數尺。其骸在金國內。

庫尾鬣支體俱全。雙角已為人所截。法苑珠林。俱名國有商人驅八牛。牧於澤中。時有離車捕得一□□將□之商人以八牛易致。取放別池中。龍忽□□□□□□□□龍女與八餅金云。此是龍金。截已□□□□□□□□眷屬終身用之不盡。又貞觀十八年□□□□□□雲中落一石。大如碓甯脊高腹平□□□□□□伽陀菩提寺長年師到西京。敕問之。是龍食。二龍相爭。故落下耳。開寶六年。漢陽軍獻蛤。有文隱起。龍長五寸。金色鱗甲皎然。

鳳皇見新蔡

漢甘露三年二月。鳳皇集新蔡。群鳥四面行列。皆向鳳皇立。以萬數。光武十七年十月。鳳皇五。高八九尺。毛羽五彩。集潁川郡。羣鳥並從行列。蓋地數頃。留十七日乃去。晉穆帝升平四年二月辛卯。鳳皇將九子見鄖鄉之豐城。梁武穆九年。海州言鳳見於城上。羣鳥數百隨之。宋真宗景德元年五月庚寅午時。白州有三鳳自東來。入城中。眾禽圍繞。至萬歲寺。棲百尺木上。身長九尺。高五色冠如金杯。申時北向而去。金章宗太和二年八月。武安縣鼓岩聖臺有鳳鳥集於臺上。其羽五色爛然。文多赤黃。頰冠鷄頂。尾潤而修。狀若鯉魚尾。而長高逾人。九子差小。侍傍亦高四五尺。禽鳥以

萬數形色互異或飛或蹲或步或立大者在內小者在外皆成行列首皆正向如朝拱村民懼為官司所擾驅牛數十頭擊折以逐之未至二里即有鷲鳥翼長丈餘擊水牛皆死鳳為日所炤則有二大鳥更迭蔭庇日下乃止凡三日乃從西北去縣中三日無鳥雀村民掘臺下三尺許得金劍不可取折其半化為金蟬飛去至於漢昭元始三年鳳見於東海太始元年鳳集於膠東四年鳳集於北海地節二年鳳集於魯元康元年鳳集於泰山陳留元康四年鳳獲於南郡神雀二年鳳集於京師四年又集於京師又鳳皇十一集於杜陵集於上林漢安延光三年鳳集於濟南又集於京兆元嘉元年見於濟陰光和四年見於新城延康元年集於石邑又郡國十三言鳳皇見吳黃武二年見蒼梧黃龍元年鳳見於武昌寶鼎四年鳳見於西苑泰始元年鳳見於上黨高都又鳳皇二見於河南山陽鳳皇三見於馮翊下邳升平五年鳳集於沔北天監初鳳見於建康集於蘭陵永初元年鳳見於山陰孝建元年鳳見於丹徒王建天祐七年鳳見於萬歲縣章帝元和二年以來至章和元年三年而鳳皇三十九見果於來儀之瑞同符否耶鐵山圍叢談博白有遠村號錄舍其民自誇山多鳳皇詰之云其狀如鷲五色有冠居大木之顛穴木而巢遇天氣清明必雙出出

必雙飛所過則諸鳥斂翼俯首而伏不敢鳴喘古人謂南方丹山有鳳信矣

按建武中有大鳥集東陽五采皆備赤色居多沈約以為焦明郁離子南方之鳥五采而象鳳名昭明其性好亂出則天下有兵瑞應圖肅敬狀如鳳皇銳喙見則荒歉之應又西方曰鷦鷯疫之感東方曰發明喪之感南方曰鷦明水之感北方曰幽昌旱之感皆似鳳而非鳳然則前之所云鳳見者殆未必真鳳乎洞冥記東方朔游房林之野獲九色鳳雛

頻迦鳥

酉陽雜俎鳥有四千五百種獸有二千五百種偶就諸書中摘羽族之異者迦陵仙禽也在卵殼中鳴聲已歷眾鳥

楞嚴經迦陵仙音遍十方界

又頻伽共命鳥一頭兩

身

會述之頻迦

陵此翻好聲音蒼梧有鳥名馮霄吐五色氣啣土成境積珠成籠其珠輕細如塵

桂海虞衡志鳥鳳如喜雀色紺碧頸毛類雄雞鬚頭有冠尾垂二弱骨各長一尺四

五寸其秒始有毛羽一簇冠尾絕異大畧如鳳鳴聲清越如笙簫然度曲妙合宮商

又能為百虫之聲馬韓有長尾鷄尾長五尺滇中有鳥名信天公食魚而不能捕俟

魚鷹所得偶墜者拾而食之蠻溪叢笑金鷄羽族似雉者金項火背班尾楊翹志意

揭驕籠之不能馴。唐史咸通中。吳越有異鳥。極大。四目五足。鳴山林。其聲曰羅平。占曰國有兵。人相食。北戶錄。端新州有鳥。類青鯢。而嘴大。常在池塘間。捕魚而食。每作一聲。則有蚊子。群出口。按爾雅曰。鷦鷯。母註以鳥羈而大。黃白雜文。鳴如鴿聲。廣志云。蚊母。此鳥吐出蚊也。其翅堪為扇。辟蚊子。大中祥符六年。代州五台山有吉祥鳥。見七發。濶章白鷺。濶章。鳥名。杜少陵詩。竹林為我啼。清畫。竹林鳥名。同州有之色正。清如雀。善啼。應菴隨筆。山菌子。鳥名。如小鷄。無尾。生江東山林間。酉陽雜俎。鷽鷽。一名墮羿。形似鵲。人射之。則啣矢反射之。墨客揮犀。河州有禽名骨託。狀如雕。高三尺許。常鳴。自呼其名。能食鐵石。郡守每置酒。輒出以饗座客。或疑鐵石至堅。非可食之物。乃取三寸白石。繫以絲繩。擲其前。即啄而吞之。良久牽出。其石已如泥矣。外荒記。南海有狗國。有飛涎鳥。似鼠。兩翼如鳥。而脚赤。每至晚。諸禽栖未散之前。各占一樹口。中有涎如膠。遠樹飛涎。沾灑眾枝葉。他禽如在網中。乃徐食之。如竟午不獲。即空中逐而涎惹之。無不中焉。拘弭國有却火雀。純黑。大小似燕。其聲清。殆不類尋常禽鳥。置於火中。火自散去。輿地志。愛州移風洞有潮鷄。鳴長且清。如吹角。每潮則鳴。一名林鷄。其冠四開如芙蓉。九華山志。念佛鳥。大如鳩。羽色黃褐。翠口相間。而成文音。

韻清滑如誦佛聲一名念佛子朝野僉載劍南彭蜀間有鳥大如指五色畢具有鳥
似鳳食桐花謂之桐花鳥李德裕有桐花鳳扇賦序劉績霏雪錄云即東坡所謂綠
毛么鳳也俗名倒掛唐僧隱巒詩五色毛衣比鳳雛深春花裏口如無美人買得偏
憐愛移向金釵重幾銖益部方物畧記桐花鳳二月桃花始開是鳥翱翔其間丹碧
成文纖嘴長尾仰露以飲至花落輒去贊曰金花之露俗曰鳳類綠羽纖爪藻背翠
尾花落則隱以是見貴李之儀有阮郎歸一詞詠倒掛云此鳥以十二月來日間焚
好香則收而藏之羽翼間夜則張尾翼而倒掛以放香一名收香倒掛又名探花使
性極馴好集美人釵上宴客終席不去又益部方物畧有鳥名紅桐嘴出永康軍山
谷中絳體若赭惟羽間差異人亦畜之然不能久也燉煌新錄膺蘇割刺在答魯之
左大澤中有天仙椒大如彈丸焚之香徹數十里每燃椒則有鳥自雲際蹁躚五色
名顏爾鳥蓋鳳凰之種峨眉山有護花鳥至春則啼若云無偷花果彷彿人言云西
陽雜俎魚復縣南山有鳥大如鵠鵠羽色多黑雜以黃白頭頗似雉有時吐物長數
寸丹采彪炳形色類綬因名吐綬鳥又食必蓄嚙臆前大如斗慮觸其喙行每遠草
木故一名避株鳥又馬鷄出洮州衛嘴脚紅羽毛綠唐代宗大曆八年九月武功獲

大鳥肉翅狐首四足有爪長四尺餘毛赤如蝙蝠羣鳥隨而噪之昭宗天復三年宣
州有鳥如雉而大產有火光如散星集於戟門明日大火乳母鳥是產婦死變化作
之能取人之子以為己子胸前有兩乳食大粥琵琶羅國有駝鶴長六七尺有翼能飛
或燒赤熟銅鐵與之食瀛洲有藏珠鳥如鳳身紺翼丹每翔鳴而吐珠累斛杜陽編
順昆明國有嗽金鳥形如雀而色黃銛以真珠飲以龜腦鳥常吐金屑如粟可以為
器博羅縣羅浮山出五色鵲貴人至則先翔集九華山志音聲鳥一名雲韶部形
練鵲毛具五色喙紅足碧一種畧小羽間玄黃□□或紅暮春早秋時一見之風
輕烟煖聲響互發如聆簫韶搗藥鳥月夜獨鳴於深巖幽谷中啼曰克丁當宛如杵
臼敲戛聲王梅溪詩聞說仙翁搗藥處鳥聲依舊克丁當影娥池有并藻鴨赤色每
止於芙蓉上不食五穀惟啞葉上垂露亦名垂露鴨續博物志江浙有鳥名飛生狐
首肉翅四足如獸飛而生子即隨母后有人難產以其爪安胸腹間立驗杜陽編朱
來鳥紅嘴紺毛尾長於身巧解人言善別人意天祿閣外史扶桑之野有鳥曰搖光
感日之精千歲一孕其形如龜三輔黃圖飛廉神禽也一名龍雀能致風氣身似鹿
頭如雀有角而蛇尾文如豹拾遺記底支之國獻重明之鳥一名雙精玄雙精在目